

## CATULL. 22

Suffenus iste, Vare, quem probe nosti,  
homo est venustus et dicax et urbanus,  
idemque longe plurimos facit versus.  
puto esse ego illi milia aut decem aut plura  
perscripta, nec sic ut fit in palimpsesto        5  
relata: cartae regiae, novi libri,  
novi umbilici, lora rubra membranae,  
derecta plumbo et pumice omnia aequata.  
haec cum legas tu, bellus ille et urbanus  
Suffenus unus caprimulgus aut fossor        10  
rursus videtur: tantum abhorret ac mutat.  
hoc quid putemus esse? qui modo scurra  
aut si quid hac re scitius videbatur,  
idem infaceto est infacetior rure,  
simul poemata attigit, neque idem umquam        15  
aeque est beatus ac poema cum scribit:  
tam gaudet in se tamque se ipse miratur.  
nimirum idem omnes fallimur, neque est quisquam  
quem non in aliqua re videre Suffenum  
possis. suus cuique attributus est error;        20  
sed non videmus manticae quod in tergo est.

TRIMETRO GIAMBICO SCAZONTE O COLIAMBO

X — U — X — U — U — — X